



I Lisa Om Kinaantakan Di Pinohosok Dau





I Lisa nopo nga' songuhun tanak
i kiumul do 9 toun i aanangan do
humozou. Id daamin, songian nopo do
aavi' o kalaja' sikul dosido, humozou
nodii zosido doid di tobpinai tondu'
tomuhok tonini' dau do maamaso
i mohoing dioho' poposodia' do
takanon doungeosodop.



Insan sosodopon ontok maso makan,
pinoiho di ngoduvo mohoing dau i
Lisa do mikot mizon miampai dioho'
i mamai dau i Jin do naamot disido
papapanau kalaja' id kakadazan.
I Mamai Jin nopo nga' tobpinai kusai
tomuhok di ina' dosido.




Piipio tadau mantad dii, koikot no i Mamai Jin. Minogovit isido do piipio kavo pomoomoinan paapapan montok do kohominan.



Tuminimpun i Lisa mamain do pomomoinan diti miampai di Mamai Jin.




Au' no ahaid mantad dii,
noubasanan dii do kohominan
do mamain do pomoomoinan
paapapan dii ahapas do makan
doungosodop.




Insan minsosodop, nokoongou i
Mamai Jin di Lisa do huminozou
doid di tobpinai tondu' tomuhok
dosido. Pinopoiho i Mamai Jin di
mohoing di Lisa do kikabaahan
zosido do humozou.



Minangazou i Mamai Jin di Lisa om
minanaak dosido do tutungkap.




Nounsikou tomod i Lisa om
minoboos do, “Kotohuadan”.



Insan tadau, ontok maamaso i Lisa monodo do kalaja' sikul dau id hinimput dau, suang no i Mamai Jin id hinimput di Lisa. Minoboos i Mamai Jin do kaanu isido monuhung di Lisa monodo do kalaja' sikul dau.




likau no i Mamai Jin id dabping
di Lisa. Minomolisa' isido do
kalaja' sikul di Lisa om minanaak
dii do 'high five' kumaa di Lisa tu'
nokotunud ngaavi' i kalaja' sikul
tinoodo dau.



Ontok timpu makan doungeosodop,
pinopoiho i Lisa do mohoiing dau do
minonuhung i Mamai Jin do minomolisa'
di kalaja' sikul dau. Nounsikou tomod
i mohoiing di Lisa. Ka dioho' kapanaak
dioho' iti do hobi timpu monompuan
do kalaja' id daamin, poposodia' do
takanon doungeosodop om mintamong
di tobpinai tondu' tomuhok di Lisa.



Mantad dii, tikid minsosodop no dii
i Mamai Jin sumuang id hinimput di
Lisa do monuhung doid kalaja' sikul
dau. Ogumu o soosolita di mamai
Jin om i Lisa.



Kambazo' no di Mamai Jin i Lisa miampai do minoboos do, "Poimbiibida' ko tomod Lisa." Noikot nounsikou i Lisa nokoongou do boos di Mamai Jin.




Insan tadau, di maamaso i Lisa monodo do kalaja' sikul dau, suang no i Mamai Jin id hinimput om poongobo' no dau i vavazaan.




likau no isido id dabping di Lisa
miaga tomoimo. Nga' ontok tadau
dii, kamao' no dau i poo' di Lisa.



Minoboos i Mamai Jin do, “Iti nopo nga’ mamaamain... sabab poimbiibida’ ko tomod.” Nga’ au’ asanang topiumanan di Lisa om insi’ do mininsodu’. Pinopoiho’ i Mamai Jin di Lisa do, “Au’ ko kavasa’ do mononsunud disai-isai noopo kokomoi do kinaantakan diti tu’ au’ i’ izioho’ otumbazaan diau.”



Ingkaa nogi' o naantakan do tadau
suminusuut om tomoimo no dii o
aantakan miaga diho'. Au' dii i Lisa
koiho do oonu o maan dau. Oosizan
zosido. Nokotood dii zosido humozou
doid di tobpinai tondu' dosido.




Uot no zi Ina' dau, "Kivaa nuununu nu? Ahaahaid zou no au' nokoongou diau humozou." Aiso bongut di Lisa. Okito dau i Mamai Jin do pointudung dau mantad saasavat id tukad.



Unduk no i Mamai Jin mantad id tukad om uot no do, “Ooi! Oonu akanon sodop baino?” Pongiak no zi ina’ di Lisa miampai suminimba disido do, “Pizza!” ka.




Ontok id sikul, au' dii obinsolita'
i Lisa. Uot no i Rani i tambahut
tavasi' di Lisa, "Nookuo ko Lisa?
Nookuo tu' poimizo ko nopo?
Nookuo tu' au' ko no dii mogigiana'
miampai dagai?" Momohingog
nopo i Lisa om tumiduku' zosido.



Intangai no di Rani i Lisa. “Ohunggui ko tokito ku. Ka di ina’ ku nung kivaa nopo kaantakan di popohunggui toi ko’ mogundoosi dogo’, mositi’ do kivaa songuhun i poihoon ku. Au’ zou kavasa’ do popohosok dii. Dadi’, poihoon’ zou no kama. Nookuo tu’ ohunggui ko?”




Au' no ahaid mantad dii, tingaa' no i Lisa di Rani om poboos no, "I Mamai Jin... mangama' dogo'... Au' zou aanangan miaga dii. Tikid sosodopon isido miaga dii id hinimput ku... ontok maso zi Ina' om zi Apa' poposodia' do takanon doungosodop id dopuan. Oosizan zou tomod." Om iad no zosido.



“Mositi’ do poihoon nu i mohoing nu,” ka di Rani. Simba no i Lisa, “Au’ zou katama’ popoiho dioho’ tu’ aanangan tomod izioho’ di Mamai Jin. Om ka di Mamai Jin, au’ i’ izioho’ otumbazaan do oonu i pobooson ku.”




Koikot nopo i Rani id daamin mantad sikul, poi hoo' no dau zi Ina' dau, zi Andi' Mala, do oonu i pinosunud di Lisa. Nokotigog tomod zi Andi' Mala om poi hoo' no dau i Rani do mositi' do tuhungon dau i Lisa. Tolifounai nodii di Andi' Mala i Andi' Julia, mongingia' kalas di Rani om di Lisa.




Kosuabai dii, hoovo' no di Andi'
Julia i Lisa om toodoo' i' dau do
monongkiboos di Lisa. Poihoo' no di
Lisa i Andi' Julia do oonu i naantakan.




Minoboos di Andi' Julia, "Lisa, tantu' no do noikot ko no do noosizan. Au' apatut i Mamai Jin do mimang miaga dii. Avasi' po tu' au' nu hinosok o kinaantakan diti om pinoposunud ko di Rani. Baino nopo dii nga' mogium tokou do lahan popotood diti."



Tuutulus do minonolifaun i Andi'
Julia di ngoduvo mohoiing di Lisa
do popoikot id sikul om poihoon' no
dosido oonu i naantakan.



Noikot notigagang ngoduvo mohoiing di Lisa. Maai no di Ina' dau kambazo' i Lisa om poboos no, "Siuu nokozo do naantakan ino doid diau. Nakahasa toomod i mamai Jin do minimang diau do miaga dino. Avasi' po tu' nakatama' ko pinoposunud di Rani om mongingia' nu."



Poboos no zi Apa' di Lisa, "Mooi tokou luput id pulis baabaino. Au' nodii pakavasa'on i Mamai Jin do mizon miampai dotokou. Kotunud no kozo do pinoposunud ko dagai do ahal diti. Kada' kotongob, potontuon dagai do au nodii isido kaanu' po moninduo diau."



Gopuso' no dioho' ngoduvo i Lisa.



Ingaton iti: Nung kivaá mooí kama' diau, kada' hosoko'. Posunudo no kumaa doíd songuhun tambahut kokomoi oonu i naantakan diau.



Suangai id bulanding miampai
ngaan do iisai i kotumbazaan om
kaanu monuhung diau.



Pusat Kesedaran Wanita adalah sebuah organisasi bukan berkeuntungan yang ditubuhkan untuk membendung keganasan terhadap wanita dan kanak-kanak serta mempertingkatkan kesaksamaan gender dan keadilan sosial.

Penulis

Prema E. Devaraj

Penterjemah

Rita Lasimbang, Dr. Andreas Totu,
Jamila Bosimin

Kartunis

Azmi Hussin

Lakaran dan Reka Letak

C-Square Sdn Bhd, Penang


Penerbit

Pusat Kesedaran Wanita

Disokong oleh

Hasanah Special Grant

© 2020, Pusat Kesedaran Wanita, Pulau Pinang

 www.wccpenang.org

 wcc@wccpenang.org

   WCC Penang